



2022-2032 | INTERNATIONAL DECADE OF
Indigenous Languages



PanSALB
PAN SOUTH AFRICAN LANGUAGE BOARD



BOHLOKWA BA HO TSEBA PUO YA MATSWALLWA

Ka Mosa Mutle



Mosa Mutle

Ho ya ka nna puo e feta mokgwa wa puisano; ke sehokelo se hokahanyang batho le bophelo ba bona ba nako e fetileng le ho theha matla a bona setjhabeng, maikutlong le moyeng. Mme ke dumela hore ho ho rona bohle ho ntshetsa pele le ho sireletsa puo ya habo rona. Puo ya habo rona e a re kgetholla, ka hona re tlameha ho etsa makgobonthithi ho e sireletsa. Mehleng ena batho ba dumela hore haeba o tseba puo ya heno hantle, ha o bohlale ka ho lekaneng. Mohlala, batswadi ba bangata ha ba batle hore bana ba bona ba ithute dipuo tsa Afrika hobane ba dumela hore dipuo tsena di ke ke tsa thusa bana ba bona. Mme ha ba elellwe kotsi ya ho se kgothalletse bana ba bona ho bua puo ya matswallwa, sena se tla etsa hore nakong e tlang dipuo tsena di shwe.

Puo ya matswallwa e phetha karolo ya bohlokwa ho tsebahatsa seo motho e leng sona. Puo e na le histori

le setso. Ho ithuta puo ya matswallwa ho akarelletsa ho ithuta meetlo le setso se tshwanang le sa batswadi ba rona, beng ka bona, esita le meloko e fetileng le e latelang. Ho elellwa hore o wa morabe o itseng wa batho ho fana ka kgodiseho le botsitso. Ka hona batho ha ba lokela ho qeaqea ho ithuta le ho utlwisisa dipuo tsa bona. Ho bohlokwa haholo ho tseba puo ya hao mme sena se eketsa monyetla wa ho tseba le ho utlwisisa seo o leng sona. Hodima moo, e eketsa monyetla ya ho ba motho ya molemo. Ke dumela hore batho ba tsebang puo tsa bona tsa matswallwa hantle ke batho ba bohlale ka ho fetisisa. Leha ho le jwalo, ha ke re batho ba lokela ho ithuta dipuo tsa matswallwa feela empa ke hatisa hore ba tshwanetse ho tseba puo ya bona pele ba sebedisa dipuo tsa batho ba bang. Dipuo tsohle di bohlokwa ebile di na le thuso haholo ka tsela e itseng. Di dumella batho ho ba le kelello e bulehileng ho ditso tse fapaneng, hape di ba nolofaletsatsela ya ho kena lefatsheng le itseng, ho ithuta meetlo e metjha, jwalojwalo, mme di fana ka monyetla wa hore batho ba kgone ho buisana le batho ba dipuo tse ding ntle le mathata.

Ha ke phethela, ke re ha re sa bue dipuo tsa habo rona, re tla lahlehelwa ke setso le pono e ikgethang ya lefatshe. Puo ka nngwe e emela setso sa yona ha mmoho le pono e ikgethang ya lefatshe. Le ka hare ho maikutlo ana, ho na le taba ya hore puo ka nngwe e na le mokgwa wa yona wa ho emela beng ba yona ka mantswe. Kahoo, ha puo e eshwa, re lahlehelwa ke meetlo, tswelopele, ponelopele re be re lahlehelwe ke batho. Re lahlehelwa ke maikutlo le mehopollo, empa ho bohlokwa ka ho fetisisa, ke hore re lahlehelwa ke mokgwa o ikgethileng wa ho ba batho.

Potso ya ka ke hore na molemo ke ofe wa ho bua le ho tseba dipuo tse ding hantle empa o sa tsebe puo ya hao?